

四庫全書

集部

欽定四庫全書

集部  
元詩選三集卷十五

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣馬啟泰

謄錄監生臣劉護

欽定四庫全書

元詩選三集卷十五

庶吉士顧嗣立編

張簡雲丘道人集

簡字仲簡吳人初師張伯雨為黃冠自稱雲丘道人隱居鴻山元季兵亂以母老歸養遂返巾服又號白羊山樵洪武二年召修元史玉山主人謂仲簡作詩淡雅有陶韋風楊鐵崖謂仲簡詩工韋柳翰墨無俗氣而暗合書法自詩名益

著而字畫因之而並行王子充序仲簡詩亦曰  
溫麗清深有類韋柳蓋元末詩人之傑出者也

春日齋居書事

垂簾覺春靜水檻幽情多蘭香舞雙蝶淥水一作源浮羣

鵝微微

一作激激

晴雲度輝輝野氣和新柳帶長坂飛花汎

輕波閒居違佳景芳事俱凋訛忽忽已初夏綠暗青山

阿

初夏偶成

清風度虛閣，飛花集羅幃。方欣晝晷永，不覺春光歸。鳴琴發逸響，嘉樹含清輝。幽情多默悟，澹景寧相違。覽書

感虛

一作澄

寂獨閉南齋扉

次韻落日墟上晚眺

荒墟屬晚眺，日暮烟華消。落花散芳渚，孤雲度晴霄。感物微情切，懷人幽思遙。辛夷花未發，難寄最長條。

題趙彥徵茗溪山水圖

吳興佳山水，遠近蓄清光。茗窠金蓋峰，秀色獨蒼蒼。煙

雲互出沒草木生風香長橋接迴溪積石倚崇岡樵漁  
識徑幽於以樂深藏擊鮮列魴鯉啓翳理松篁晨雨況  
可鋤春泉亦堪湘既以長孫子所願安是鄉嗟哉風塵  
中何由得尚羊趙君鍾神秀揮洒發奇章卷圖思舊遊  
掩抑不能忘

鬻石篇

山中學仙人斷穀自有方泌水生石精鬻之以為糧候  
火中夜起松材龔磬香初以昆吾刀間以瓊莖漿長年

尚服食玉體生光芒一朝凡骨換白日凌

一作玉清

風翔

楊鐵

崖云仲簡衛石篇飄飄然有凌雲之氣者也

送鄭同夫歸豫章分題姑蘇臺

崇臺去千載風日麗飛甍漠漠春洲草寧知歌舞輕香泥汙麋跡嬋娟若為情登覽猶悒悒況乃送君行

幽蘭題姚節婦金氏傳後

幽蘭生深谷靡靡多容光衆草雖共長安得比其芳修叢泛光風紫莖明朝陽豈徒媚春色特以持貞良幽閒

意自得婉淑情不傷忽然商飈發肅肅飛嚴霜卉木競凋謝山林亦荒涼惟茲一寸芳枯槁猶馨香豈同桃李花零落隨風揚小草有堅操雖死而不亡佳人在空谷遭時不平康能以禮自持與世扶綱常我歌幽蘭詩楚調悲中腸掩抑發鳴琴聲盡餘慨慷

玉笙引

一作周郎  
玉笙謠

我嘗躡輕鴻浮空度瑤闕醉看碧桃花吹笙弄明月仙人王喬董雙成為作春水流花聲崑崙十三鳳飛舞相



和鳴曲終飄然上鶴去逸韻散落天風清自從失脚墮  
塵世飛夢尚繚芙蓉城淳丘公今不見白玉龜臺走雷  
電雲和妙曲杳無聞萬壑松風洗清怨

醉樵歌

東吳市中逢醉樵鐵冠敝側髮飄蕭兩肩矻矻何所負  
青松一枝懸酒瓢自言華蓋峰頭住足跡踏遍人間路  
學書學劍總不成惟有飲酒得真趣管樂本是王霸才  
喬松自有烟霞具手持崑崙白玉斧曾向月裏斫桂樹

月裏仙人不我嗔，特令下飲洞庭春。興來一吸海水盡，  
却把珊瑚蕉作薪。醒時邂逅逢王質，石上看棋黃鵠立。  
斧柯爛盡不成仙，不如一醉三千日。于今老去名空在，  
處處題詩償酒債。淋漓醉墨落人間，夜夜風雷起光怪。  
按張羽靜居集云：元季淮南行省參知政事臨川饒介  
之分守吳中，自號醉蕉，求諸作已設宴酬款，以詩工拙  
是生仲簡之歌最協，意居首席，酬黃金十兩，次高青  
丘白金三斤，次來儀止一鎰。蓋詩有諷畧，不滿快也。

送徐教授曉山歸武林

三年言子邑寂寞，鼓鳴琴官舍冷如冰。杏花春滿林花

風敦薄俗清氣集虛襟歸去吳山下青青草正深

次韻寄鐵崖

鐵笛先生老更迂摩空有賦擬相如奇文一變中吳學  
大關猶編後世書絳帳風搖珠絡索水窻雲沁玉蟾蜍  
小娃唱得新番曲多是芳亭春雨餘

次韻寄雲林

栖神之山雲雨齊雪消春水漲橫溪長松正與層樓對  
高士還同獨鶴栖每見迂名嗤薄俗絕無塵事惱清閨

燕游一月不歸去應愛竹林鶯亂啼

破山澗上聽水

破山龍去雨初歇坐聽飛泉濺石崗萬壑風雷喧地軸  
九秋雲露瀉天潢好從細草陳瑤席更趁飛花送羽觴  
飲攢上流奔軼者何年來此結茆堂

寄靈石張尊師

揚許遺經久不聞能書只說華陽君清修每自披靈笈  
高卧因誰寫練裙春晝雨晴山擁坐秋空月皎鶴成羣

何時去覓幽棲地  
郁木坑頭禮白雲

長句寄叔方先生

盧橘花開梓樹疎  
故人安穩在樓居  
翠簷狎坐春行酒  
絳帳懸燈夜讀書  
未必醉來忘簡寂  
祇緣老去尚高虛  
離羣應念任春者  
道遠天寒欲命車

和鐵崖小臨海十首

海靜不揚波  
仙人鞚鶴過  
靈峰七十二  
何處月明多

扁舟下彭蠡  
望見大

一作古

君山只道支機石  
移來天漢

灣

歌按

一作罷

霓裳曲分行舞廣庭天壇看星斗散亂若浮

萍

海門棹馭出鯨吼浪花飛孔翠排旂蓋雲昏黃鶴磯  
龍子丹砂鬣金芒耀水盈真人忽騎去霹靂破天根  
夜過洞庭曲青山玉作堆仙人吹鐵笛白鶴自飛來  
雨過積金頂芙蓉萬朵青神魚不飛去風伏翠濤腥  
憶坐松根石相看說大還崑崙雲一朵喚作九華山

仙花雲萬疊浩劫與春開却笑珊瑚樹焦枯作死灰  
海上三神嶠嘗看羽蓋飄玉虹三百尺噓氣結成橋

題雲林竹二首

廣平舊作梅花賦鐵石心腸嫵媚辭高士巖前清賞足  
月明竹外寫橫枝

笠澤莊頭道士家書林風竹翠交加新梢便有凌雲勢  
高出牆簷掃落花

和西湖竹枝詞

鴛鴦蝴蝶盡雙飛  
楊柳青青郎未歸  
第六橋邊寒食雨  
催郎白苧作春衣

遊石湖和鐵崖韻

梁燕低飛妒舞腰  
春洲寂寂百花消  
扁舟不見鷓鴣子  
空使江城響怒潮

周玄初來鶴詩

洪武己巳

手把芙蓉攝羽裙  
飛書南啟魏元君  
祝融峰頂雲初起  
借與長風送鶴羣



瞿智睿夫集

智一名榮智字睿夫一字惠夫其先嘉定州人  
父晟遷崑山兄信字實夫時齊名稱二瞿先生  
智嗜學明易至正間憲司試辟後青龍鎮學教  
諭攝紹興府錄判尋棄官去睿夫博雅能詩以  
書法鈎勒蘭花筆致妙絕時寓華亭所居有通  
波閣與黃晉卿段吉甫李季和成原常張伯雨  
諸君友善季和嘗曰予客游婁縣與瞿郭盧呂

諸君日相從為嬉遊登山臨水飲酒賦詩五六  
人者無不與焉伯雨贈詩云青龍江上古儒宮  
予去橫經作士風當戶九峯春樹隔去家百里  
海潮通原常贈詩云老夫亦有鷺溪絹也欲相  
從看畫蘭亦極一時之盛也

白雲海歌次文學古韻

白雲深白雲深白雲深護山之心有時隨龍去滄海候  
馬天宇團秋陰英英不來入我牖直上璇霄掩箕斗或

貫日色流玉虹或漏雷聲墮天狗山人學禪草菴裏靜  
看白雲朝暮起此心欲與雲俱閒又逐溪風過溪水紛  
紛武士尚揮一作操戈格鬪東南未決何安得此雲化霖  
雨洗兵甲散為玉燭四海皆陽和雲兮雲兮如擘絮奈  
此東流復如注山人祇在玉山中長繞山人草菴住

虎丘燕集送

關

之秣陵分賦姑蘇臺

高臺崔魏插天起勢壓雄城三百里雲牕霧閣迷烽煙  
日日吳王醉西子桂膏蘭燼燒春雲錦絲瑤管空中聞

甲兵重來破歌舞  
粲齒修眉散如雨  
雙鉤帶血不敢飛  
城荒草碧春風吹  
祇今惟有臺前月  
曾照吳宮花發時  
慷慨悲歌歎陳迹  
霜烏怨啼楓葉赤  
明朝送客過鍾陵  
西望茫茫五湖白

從軍行二首

年少去從軍  
妻兒生死分  
弓開孤月影  
劍動七星文  
解識風雲氣  
能穿虎豹羣  
不將身許國  
何以樹功勲

破敵三營外  
城頭日欲低  
舉烽連磧遠  
戰氣接雲齊  
旌

幟驚烏起鏡蕭雜馬嘶祗愁十里月少婦正悲啼

送于彥成歸越次邨九成韻

匡山于外史上越有歸舟久負江湖約

一作客

寧知

一作為

歲月流瓊書天上鶴涿水鏡中鷗一曲真幽絕當追賀

監一作老遊

和義仲韻東玉山

莫怪清狂似謫仙乘涼遠過玉山前

一作劍

蕭夜動黃

姑渚翠被風生越鄂船雲樹亭臺全却暑芙蓉

一作蓉華簾

幙半浮煙賦詩刻燭良宵飲知是衣冠不乏賢

廉夫自滄江過顧仲瑛桃源作詩以寄并柬玉山

老鐵仙人海上來海雲長日護樓臺玉簫彩鳳時時下

黃鶴珠簾面面開不逐蟾娥歸月府却馮華一作從花使過

蓬萊見說武陵重有約一作晚棹不連重去路一溪一作灣流水似

一作即天台

次韻呂養浩

客子頻煩尺素修江雲變態故生愁山迴絕磴參差樹

花隱重城縹緲樓雨裏未須秦望屐雪餘擬汎越溪舟  
蒙郎古道多歸思桃葉春情隔渡頭

十一月廿四日紹興作

秦望山頭雲氣生越王城下湖水平梅花欲放不盡放  
雨色待晴還未晴銅駝金谷非故里青衫白髮徒虛名  
可憐百年已過半空嗟萬古難為情

盧彥志自台州候官至維揚

台州候吏揚州去驛馬回途一月期官寺偶分銀燭坐

客樓每怪玉杯遲  
山中桃樹仙人洞  
天下瓊花石土祠  
盧彥此游元不浪  
錦囊收得數篇詩

次韻監郡魯公二首

鏡裏湖光煖欲波  
客情惆悵不能過  
蓉花簇簇開岩岫  
雲片飛飛起鵲鵲  
載酒小船輕若葦  
穿城夾膝小如梭  
每因公事歸來晚  
無奈重樓月色何

祇合明時早挂弓  
漫勞車馬駐江東  
烟開溟海清蠻蜚  
水滿平湖沒鴈鴻  
鐵騎夜馳蓬閣下  
雲旗晴卷石城中



萬方應喜平羣寇當與汾陽並大功

次張句曲題楊鐵崖新屋詩韻

亭子高臨洗馬河亭前夜月動微波倚闌天上蕭聲發  
卷幔岩前樹色多未許韓家修五鳳欲從房相賦羣鷺  
連城芳草遙相憶誰解玲瓏醉後歌

寄莊蒙泉

樓殿高低瞰海邊潮生靜看月流川祕函夜誦天仙下  
香積晨齋繡佛前碧蓋團雲陰寂寂珠旒分雪溜涓涓

支郎絕愛山中景吟得篇詩與世傳

簡熊松雲

西岡無奈景純何陶寫新詩日漸多  
宜似蘭苕飛翡翠每嗟荊棘長銅駝  
日曛山崦收黃霧秋入江風動白波  
復憶松雲老文學醉乘蕭鳳肯相過

寄張伯雨

服食年深玉雪臞半簪華髮不成梳  
入山早棄人間事閉屋獨修河上書  
丹火夜明雞犬宅劍光寒辟斗牛墟

擬將一匹鵝溪絹寫作玄州舊隱居

碧梧翠竹堂

高堂背郭對青山盡日褰帷景界寬  
碧樹欲隨鸞影瘦綠筠長伴鶴翎寒  
水晶簾動雪成片環珮聲閒雪作團  
久負故人詩酒約不嫌遲去倚闌干

次韻元章先生簡奉納齋判府相公一笑

倅車新赴雲間幙文采風流有譽髦  
未許蒹葭紉客佩又承雨露染恩袍  
濃薰酒漬紅螺甲清夢華生玉兔毫

退食郡齋無一事詩成渾似柳儀曹

小言問疾兼懷匡山人

東江漾漾春流濁西郭深深轍迹疎放浪久無狂賀老  
風流獨有病相如門前看竹不題鳳溪上賞花多釣魚

陸仁乾乾居士集

仁字良貴河南人寓居崑山為人沈靜簡默明  
經好古文詩不苟作自號樵雪生所居曰乾乾  
之齋因自號乾乾居士與郭翼義仲呂誠敬夫

相唱和其翰墨法歐楷章草皆灑然可觀館閣  
諸公推重之稱為陸河南楊鐵厓謂良貴詩學  
有祖法清俊奇偉如佛郎國進天馬頌水仙廟  
迎送神辭渡黃河望神京諸篇尤極稱之

春還軒

陰陽無停運太極體自常垢復造化樞日月天地房凝  
寒一已消煦煦春載陽曲塘魚上冰曾漢鴈北翔潛心  
驗物候齋居情味長容色當少壯豈不惜流光流光不

待人撫時且彷徨

送客一首贈凌元之別

送客復送客跋馬河之津  
河津雪始霽細柳嫋將春  
畫船平如屋中有白髮親  
歲晏歸鄉井母子意欣欣  
持觴壽阿母祝母年如椿  
司征祿堪養馳驅亦良勤  
雙谿見明月定當懷故人

矯矯一良士

矯矯一良士志行與世殊  
三年斲一輪十年成一車  
度

才擇堅貞髹畫飾丹朱斲輪無不方制車復有輓識者  
以為巧不識以為迂一朝祀先行出門登廣途鳴鑾和  
相應執御轡如濡邈矣天路遐懷哉若人且

賦得青天月團團盛孟章古香亭

青天月團團大於黃金井中有桂樹枝上疑山河影微  
步下亭臯夜色天與永露葉團夕陰幽芬襲巾領把翫  
明華月迢然發深醒

婁東園分韻得人字

步遊婁東園清暑水西濱水色連庭戶坐深涼蕩人葵  
花露泥泥桐葉雨蓁蓁觴酌麻姑酒歡泳習池賓晤言  
式相好諒知心所親留滯宜恒久揚鑣清路塵

送彥栗之京都

春水滿南國悠然生遠愁褰裳采芳蕙薄莫送行舟神  
都麗燕服景氣若瀛洲星連絳闕動雲承翠葉浮駕鵝  
飛海子楊柳蔭宮溝寄言幕府掾覽賞日夷猶

玉山佳處賦得山中好長日



山中好長日流景麗蓬瀛池臺帶蘭薄水色上簾旌興  
言春再交嘉鳥相和鳴木桃源上芳洵美粲條英延念  
顧長康散息志慮清豈不懷爵服馳逐正營營馳逐非  
所慕高情諒難并

玉山佳處以夜闌更秉燭相對如夢寐分韻得夜  
字

朝發吳王城輕艦從東下落日蕩柔櫓暮抵玉山舍張  
燈共清燕寂寂西園夜珠斗當層樓銀月照芳榭坐客

盛文彦逸氣凌曹謝鳴琴聆妙音使我憂心寫率意阮  
生狂明晨還獨駕

春草池綠波亭

迴塘帶蘭薄曲檻映朱甍春雨夜初至綠波池上生遊  
魚蕩清連細藻承落英浩浩謝池思悠悠南浦情日夕  
澹無語燕坐望寰瀛

碧梧翠竹堂以碧梧棲老鳳凰枝分韻得鳳字

張宴池館夕酥凝酒微凍明月流綺疏華燈照陰洞翠

琯裊遺音朱絃細成弄徙倚桐花原相期聽鳴鳳

九月八日以滿城風雨近重陽分韻得雨字

華屋帶修沱梧竹夾兩廡流雲蕩微陰冉冉菊花雨張  
筵廣樂作彼美瑤之圃仙人紫雲裘渥頰顏孔撫消搖  
愜中賞且以樂嘉聚翩然跨黃鶴渺渺渡煙渚

柳塘春小集分韻得水字

并序

丁酉歲二月廿有二日龍門琦開士自吳江泛  
舟訪金粟道人顧君仲瑛於界溪之上龍門復

貽書石川招余過此適葛君天民亦自苕霅來  
各以道路蕪梗睽離間歲慰藉問勞握手敘契  
濶語刺刺不能休其於故人之情為何如哉留  
數日日以詩酒相娛樂繼而龍門復欲還吳江  
之無礙寺道人止其行且張席柳塘春之小軒  
時春雨初霽春水初生綠波澹蕩柳色如濡舉  
酒相屬談笑甚歡酒既半道人作而言曰適斯  
時也當戎馬交馳之際凡我友朋一別如雨若

匡山于君番陽蕭君皆余之至厚者也今日之  
在會稽猶風馬牛之不相及也余之思之未嘗  
一日忘之今日得與諸君合并不知良晤又幾  
何時因思古人折柳贈別之意不能不戚然於  
懷也諸君得無言乎袁君子英遂舉柳塘春水  
漫之句分為韻各賦詩以寫其情云

修塘帶長堤柳色參雲起疎雨落高林淺渚生春水文  
軒敞櫺檻宛在水中江流波蕩輕華細藻跳游鯉故人

式相見離別何所似相對澹忘言坐聽流鶯語

陳母節義詞

迢迢南海水波浪無晨暮一葦萬里杭逢彼蛟鱷怒良  
人竟漂溺浩蕩隨煙霧海水無時枯妾恨何由訴擔將  
沃焦石去築良人墓之死弗二天秉節金石固甄甄鄰  
下雛愛惜如寶璐塵凝玉鏡臺肯怨芳年度牀前明月  
光照妾見情慙兒大羽翼成豈不懷乳哺春暉照高堂  
叢萱湛晨露母兮喜及養母也增哀慕金堅金可鎔松

堅松可蠹貞哉陳母節永言垂竹素

友竹軒詩

友道久已喪澆風何由淳對面論氣誼轉足生棘榛斷  
金臭如蘭所貴同心人取友古所難此君誠可親霜風  
凜高節歲寒相與鄰於焉念同志碌碌奚足論

買妾言

遺妾明月珠結為雙珮璫妾身幸分明暮夜亦有光

春波曲

青青太湖波小小芙蓉檝舟輕弗解操水深那敢涉

柳枝曲

朝垂金門雨暮拂玉蘭風飛絮高高去枝葉在深宮

野田雀

野雀飛在田化為田中鼠黍稌連連雲鼠食那知止

缺月詞

月體無虧缺日照乃自偏安得長合璧與天相周旋

續弦曲



麋角煮為膠續弦弦在弓擔持弦上箭不射孤飛鴻

精衛辭

精衛兩翼大飛向海波去口銜石子不知數山高高海  
深深山高海深石自沉

招鵲辭

黃鵲兮黃鵲騫翮兮扶搖一飛兮絕秦華再飛兮冲層  
霄鵲兮無弟與兄若將求其曹於乎鵲兮心惛勞燕爵  
在樊兮食且飽樂且不憂中林有木兮木有巢鵲乎歸

乎無遠遯

石婦辭

烏鳴孤竹岡春花復班班江水日東落行人殊未還妾  
孤處妾之心白於水水白泥可渾妾心潔且明望夫不  
歸那忍生精神忽通化為石千秋萬年岡上立

題文海屋洛神圖

神之媛兮霓裳凌長波兮迴翔龍輶兮孔蓋秋之水兮  
如霜浦有蘭兮蘭有萸折芳馨兮遺所思揚舲兮遽遠

目眇眇兮愁余

思公子寄馬希遠

蟋蟀兮在戶菊始花兮婀娜擘芳兮延佇思公子兮江  
之左荃橈兮桂旂江流兮泌清絙朱絃兮橫琴茶甘如  
薺兮楚酒馨宛迤兮婁水蘼蕪黃兮夕雨婁之上兮有  
園與廬思公子兮歸乎樂只

夫子去魯國

遲遲兮去魯居是邦兮爰念父與母臨沂泗兮未濟望

龜山兮有渰其雨津則有舟兮車則在道先王軌轍兮  
孰履其武道之不行兮命矣夫周旋天下

潁之水賦題劉西邨卷上

潁之水兮其流湯湯西匯於湖兮灌溉我稻梁我所居  
潁之旁郊原孔臚兮有棗與桑朝耕於潁兮夕誦於堂  
於赫在上兮如軒黃我出而仕兮遭世孔明我思潁兮  
靡忘潁水決兮潁善忘潁之人兮毋襲兮飲彼牛羊

乾明寺鐘詩與玉山同賦

猗嗟鳬氏久不作乾明寺鐘奚制度冶金為池聚於鑠  
圓範胚暉圉宵貌雷文庚庚外周郭蒲牢上呀犍兩角  
扣之響答佛鬼愕曰聰曰聵俾有覺登之崇虞度之閤  
千年縣象兔蝕剝昭茲銘言著金錯至正庚寅四月朔  
城上烏者取晉叔向城上有烏齊師其遁之謂而  
作也漢桓帝時則有其謠迨梁劉孝威吳均輩比  
有作焉然各有託而不及此意余方感悼其事因  
補其義而賦云

城上烏羣相呼羣相呼護其雛公侯干城民父母官軍  
見賊莫遁逃<sup>叶</sup>城中之民勢亦孤安得千金覓壯夫城  
上烏烏有翻東西引雛飛格格胡為羣來盡紅帕驅民  
登城要相殺烏啼城頭頭亦白

題水仙

嫩嬋媛兮清揚明月為佩兮綠雲為裳  
寒芳萋兮遺誰幽懷惓兮如結  
嫋嫋秋風之深兮可涉

天馬歌

於穆世祖肇王蹟受天之慶大命集神寓鴻圖大無及  
功烈皇皇共開闢四方上下布流澤列聖相承繼丕績  
哲王嗣位建皇極大臣弼輔尚禹稷禮樂制度靡有隙  
六府孔修萬姓懌天子聖德於昭共念承皇祖心弗宅  
日月同明天地廓絕域窮陲歸版籍萬國貢獻歲靡息  
琛瑤瑰異陋金錫豈須征討費兵革文懷遠人盡臣服  
至正壬午秋之日天馬西來佛郎國佛郎之國邈西域  
流沙瀰漫七海隔浪波橫天馬橫涉馬其猶龍弗顛踣

東逾月窟過回紇陸地不毛千里赤太行雪積滑如石  
電激雷奔走颺歛四年去國抵京邑俯首闕廷拜匍匐  
帝見遠臣重怵惕慰勞以酒賜以帛遠臣牽馬赤墀立  
金羈絡頭朱汗滴房星下垂光五色肉駿巍巍橫虎脊  
崇尺者六修丈一墨色如雲蹠兩白天閑騏驎俱駿骨  
天馬來時皆辟易驕驥屈棄未足惜大宛渥洼斯與敵  
穆王八駿思游歷漢武窮兵不多得天馬自來徵有德  
史臣圖頌永無數再拜歌詩思彷彿願帝愛賢如愛物



更詔山林訪遺逸幸逢治化齊堯日帝業永固保貞吉  
天子萬壽天降福

白紵曲送朱元長之膠州同知

白紵皎皎淨凝華皎如明河流素霞想當浣濯蹋江沙  
江水青青蘭紫芽金窗無人思綽約裁作春衣使君著  
使君有行隔千里流飈莫遣車塵起車塵起浣白紵願  
君服之保明潔載歌白紵與君別

思崑崙歌

昔我侍紫皇從游崑崙頂手持九龍節前驅陟盤嶺翠  
鳳低回玉麟騁羣御霞衣日星炳靈飈冉冉動卿雲月  
出瓊林散金影瑤草神芝光萬頃羽葆霓旌立真境吁  
嗟真境密且周黃金作屋玉作樓紫皇宴坐鏘琅璆九  
色錦褱綠華裘仙嬪左右如雲稠鳳笙龍箏音婉柔帝  
呼九霞酒遍賜星冠博令我歌洞章鵠立金鰲頭天河  
如練東南流孰曰弱水弗可舟上清真人起勸酬丹書  
玉冊夜不收帝謂大道邈以幽元氣運行天地浮俯視

昏濁穢九州鴻濛希夷誰克求嗟爾小子宜飭修還丹  
之壽齊山丘積功成練龍無由我今總爾洞府遊洞府  
遊誤落人世三千秋三千秋碧海頭黃塵眯目令人愁  
日月飛行不可留微生幸結香火緣使我再遇玉都仙  
握手大笑談重玄太山萬丈下瀑泉金莖秋露滴銀盤  
半夜白海開青蓮仙人大藥非凡鉛豈曰變化直萬錢  
一粒入口能長年仙人仙人願乞與使我復到崑崙顛  
拜手稽首紫皇前

芝雲堂嘉宴

并序

句吳著姓比古為多然好尚不同不失之侈則失之儉不失之鄙則失之迂出乎此未若有玉山顧君仲瑛者好文而尚禮好賢而尚義不侈不儉不鄙不迂承具慶之樂子孫彬彬如日之方升如蘭之方茁雍容閒雅消搖丘園誦詩讀書沖然而有德居乎界溪之上祖宗世澤亦既三百餘年矣不其甚乎然至玉山而益昌紆朱

曳紫曳不乏人至正辛卯秋九月廿二日宗族  
從子翼之氏仲淵氏適拜官歸玉山遂會親戚  
故舊於芝雲之堂行酒獻酢動有禮容言相勸  
勉不兵不教深有古人行葦伐木之情酒既半  
玉山賦詩四韻出以言事君必盡其忠入以言  
事親必盡其孝藹然忠厚之風形諸詠歌益以  
見醴陵世澤之弗艾且將大有用於時也坐客  
咸賦詩而淮海秦君文仲為之序余遂述其事

賦長句以答以紀勝集云

有吳醴陵之故家廼在東崑之西界水涯平原漫衍土  
壤沃洲迴渚曲龍盤拏我第宅切雲起植以榆柳交  
相遮駢枝接葉蔽戶牖大者合抱如星槎連林鬱蒼帶  
煙霧鵲巢鳩乳飛慈鴟中有園池廣十井架巖鑿谷開  
豁訝春風著花爛濯錦秋風落葉紅於霞雞鳴犬吠自  
旦暮桃源未須覓胡麻生祥下瑞天所念石上瑤芝秀  
金葩有魴可羹鯉可鱠有雁可弋兔可豷上堂愉愉奉

甘旨下堂雍雍手拱又阿翁素期鹿門隱阿母笑坐緹  
仙車諸郎翩翩立庭下磨角定峙蘭出芽家童聚食一  
萬指食時鐘鼓聞考撾荷鉏載耜集隴畝是穫是刈歌  
嘔啞秋登告成築塲圃黍稷梁稻同河沙東南大姓誰  
比數玉山之人美匪誇六瑚八簋宗廟器五色繅藉壁  
不瑕威儀雅同江左謝况復好禮弗侈奢征求屢多郡  
府沒蠶絲牛毛事紛華日猶庖丁得肯綮迎刃節解孰  
敢訶誦書讀詩足暇逸黃簾白日籤懸牙長時哦吟弄

觚翰宣城水曹與之差時秋九月霜未及紫萸斑斕菊  
始華張筵華堂冠蓋集親朋洽燕情孔嘉阿咸官歸映  
聯璧並騎蹀躞黃毛駒愛之猶子重誠飭謂勤王事祿  
則加虎符金章赤絲組挾以櫛

切木器  
亦作壘

貝紫玉珂聖朝

恩渥宜易致丈夫有才為國華稱觴獻酢衆樂作笙笛  
瑟筑間箏琶熊蹯豹唇味畢具籩豆修脯羅麝麝坐中  
上客儼毛遂亦有辯士如田已吳姝起作七槃舞鸞停  
鵠翔整復斜主人投轄客暢飲既醉啜以龍團茶珠斗



闌干夜將曙  
曄蠟金蓮籠絳紗  
古云人生行樂耳  
白髮母令垂  
鬢髮風埃南國星  
紀暮百年歡會能  
幾何我歌行葦為  
君壽感君氣誼增  
猗嗟謂子不信如  
此酒願君壽考子  
孫多神之聽之降  
福遐神之聽之降  
福遐

白雲海歌和文學古韻

白雲深白雲深  
白雲解結山人心  
朝飛玉山陽暮宿  
玉山陰白雲來時  
入牕牖或化長虹  
干北斗方今海內  
正風塵蕭條千里  
無雞狗却怪山人  
玉山裏掉頭不為  
蒼

生起自緣金粟悟前身要接曹溪一綫水英雄空指魯  
陽戈奈此西飛白日何連城之珍豈易識有刀莫削楚  
卞和白雲之白白於絮太行望絕心如注樓前梧竹已  
成陰定擬雲深鳳來住

花游曲和鐵厓先生

金烏流春春氣濛花雲蒸紅爛承風星船蕩向銀河裏  
手浣銀波天在水水光花色照湖門美人鬪倩芙蓉羣  
松陰冶遊馳小步蹋遍湖頭青草墓泉臺蒿目那起來

長生且進麝蒲杯仰天笑擊玉唾挽美人按度闕胡板  
鸛黃東來燕子西喃喃交語如雕題不是神仙西母使  
漢殿雙迴青翼四仙人手把五雲箋美人奪得瓊花篇

抱遺老人書巫峽雲濤石屏志

巫山十二多雲雨暮暮朝朝怨神女江流峽束捲奔濤  
幾點芙蓉隔洲渚白雲自飛明月高黃牛灩澦爭雄豪  
峽口猶思弭征擢霜寒夜聽鷲猿號君家石屏何處得  
冥冥造化春無迹却憐宋玉老多才望斷陽臺楚天碧

江雨謠題偶武孟江雨軒

白龍祠前江水綠江上何人吹紫竹江妃清怨不能降  
散作浮雲滿江曲浮雲忽變江雨來亂撒驪珠三萬斛  
天昏地黑若混沌鐵馬交馳龍戰陸初疑已陵走急湍  
復訝匡廬瀉飛瀑蛟人停機那敢織馮夷揚波自起伏  
須臾靜聽寂無聲嫋嫋如絲成霏霖長虹直截東海邊  
夕陽照向江頭屋滿邨父老起歌謠擺極今年秋雨足  
幽人開軒舉醺醪正愛晚來涼氣肅我今下榻軒中宿

幾時更剪西窗燭

憶別曲

一作襟言一章道  
中奉懷玉山主人

來時蘼蕪青歸時蘼蕪黃楊柳蕭瑟鳴蜩螳帖帖高翻

一作  
翻

鴈南翔鴈南翔懷故鄉夫君遠在婁之陽玉壺青

絲唱窈窕荷花落日棹相將

金石交為孫陳二義士賦

金石交金不可折石不可磨泉南二子重義如山河金  
石雖堅無以過泉南之山若礪而嗟峨泉南之水若帶

而妻蛇念昔髫髻約為兄弟信誓旦旦生死靡有他義  
士各有母二母相好母視其子子視其母恩義弗少差  
歲時具酒食更相為壽樂且和一出一或處或同凌風  
之舸萬里行鱸波南賈真蠟與閣婆東極三韓及暹羅  
歸來分金弗私有况被義讓情尤多嗚呼一斗粟一尺  
布淮南至今民尚哦嗚呼時之人兄弟相虐朋友為讐  
奈爾何金石之交古來有二子之義義甚都可以敦薄  
俗激貪夫鵲鵠為爾咏伐木為爾歌泉南移家來此婁

之阿比鄰相接輔車相依二母髮已皤石可泐金可磨  
人心天理無時無倚嗟二子之義可以為世模豈無好  
事繪縑素寫作孫陳交際圖

送于彥成歸越次郟九成韻

正月山陰道夫君剡上舟好峰開雪霽春水市城流拭  
目瞻雲鵠忘機惜海鷗多情今夜月何處照清遊

寄五峰李著作作一首

小車上直過宮溝城闕沉沉十二樓太乙靈光金匱夕

少微星采玉垣秋齋房度曲歌朱鷺海子驚弦起白鷗  
想得賜金歸里第鴈山依舊足清游

題謝伯誠青梧軒錄上玉山徵君求教

青梧軒前梧十尋水屋雪洞相蕭森高枝樓樓不受暑  
葉大拳拳故多陰丹丘鳴鳳幾時至金井啼烏秋思深  
謝家園池信清絕擬來與子一橫琴

送友人之京兼懷陳庶子二首

五兩摇摇孔翠翎舵樓醺酒候潮生為言北海三千里



只作南風十日行  
檣頂隕星神或降  
浪深陰火夜還明  
到京煩告陳徵士  
兩得緘書慰遠情

十月江南草樹空  
五雲天近立鼇峰  
龍沙飛雪似掌大  
馬湫醉人如酒濃  
曾佐元戎書露布  
還陪天子頌東封  
宛駒自此行千里  
消息無忘輒報懷

題金陵

麗正門當天闕高  
景陽臺下草蕭蕭  
江圍大地蟠三楚  
石偃孤城見六朝  
落日不將遺恨去  
秋風能使旅魂消

忘情只有龍河柳煙雨年年換舊條

送趙季文之湖州知事

能詩自愛水曹掾又汎樓船向雲濱方伯正思賢從事  
邑人還識舊參軍青山對幕高於弁春水連城蕩若雲  
或過王孫池沼上莫驚亭下白鷗羣

桓王墓

城東

一作南

盜發桓王墓遺物書年見赤烏羣醜

一作醜

揚

兵俱叛漢弟兄汗馬慙

一作竟

開吳早思密隧藏弓劍寧

謂陰房出兔狐英氣如生風滿樹煮蒿悽愴不能無

寄倪雲林

花明快雪鈎簾坐漫把閒情寫竹枝誰謂兩生仍在魯  
要知三謝最能詩礪頭姑惡當人語露下戎葵向日垂  
艇子不來婁水暮百回延望念深期

絳雪亭

七月海棠花滿枝却思三月見花時誰燒銀燭相為樂  
正是烽煙苦亂離絳雪飄搖從自落涼風愛護莫教吹

人生若此秋如許，不惜沉酣倒玉卮。

奉懷玉山主人兼簡郊九成于匡山

馬鞍山色兩峰尖，時送飛雲落畫檐。  
金鵲焚蘭煙嫋嫋，銀鵝舞隊月纖纖。  
語調鸚鵡花連屋，影拂鵲鵲水動簾。  
緣想清遊共于鵲，定多賦詠照牙籤。

九月七日復遊寒泉登南峰有懷龍門雲臺次玉

山韻二首

支硎山中濯寒泉，洗馬池頭草若煙。  
石拔兩關開峯罅，

雲迷萬竹秀聯娟下方鐘鼓長時發絕頂藤蘿且自緣  
東去三江流不盡浮生如此也須憐

飛龍開口日暉暉放鶴亭前路不迷漫說支郎林下少  
未緣神駿眼中稀繁霜著樹榴房折危石懸藤瓠子肥  
看遍吳中好山色太湖明月權船歸

玉山草堂

小築西郊僻渾如杜草堂不煩嚴武駕特過碧雞坊

釣月軒

積雨水平磯釣簾月上衣照見珊瑚影蘭苔翡翠飛

金粟影

池鳥夜喧寂水屋月流明坐深清景邁不知蓮露盈

種玉亭

彼美不自獻置之玉子岡珍重保靈璞春雨欲流肪

碧梧翠竹堂

嘉垣遶林色高標相與清陰涼流漫入靈籟答空鳴

湖光山色樓

朝拂昆城漲暮矚海虞孤日照簾旌裏蕭條粉墨圖

柳堂春

晴雪散河隄春雲晚復迷鯉魚跳藻葉燕子拂蘭蕢

漁莊

春船搖一葦寒留帶三星美人煙水暮相思蘭芷青

漁莊欸歌二首

灣灣流水曲闌干灘鴨芙蓉不耐寒玉手為開銀屈膝

舉頭却見月團團

日暮休憑鬪鴨闌  
落霞飛去水漫漫  
秋光都在重屏裏  
東面青山是馬鞍

題倪元鎮畫雲林圖

窈窕平林岸岸流  
雨柯涼葉樹樓樓  
秋風个裏梁谿思  
南市津頭欲問舟

和西湖竹枝詞二首

山下有湖湖有灣  
山上有山郎未還  
記得解懷金絡索  
繫郎腰下玉連環



郎別心緒亂如麻  
孤山山角有梅花  
折得梅花贈郎別  
梅子熟時郎到家

題陶淵明圖惠良夫

五柳莊前霜葉枯  
歸來三徑已荒蕪  
自書甲子紀正朔  
世上那知劉寄奴

春草堂詩集詩句

春日遲遲昭明有  
融第厥豐草零露  
濃濃春日載陽休  
有烈光萃萃萋萋  
零露瀼瀼父兮母  
兮懷允不忘念昔

先人經營四方死生契濶我心憂傷

春日遲遲燕燕于飛野有蔓草維葉萋萋母也天只思  
斯勤斯長我育我鬻子之閔斯欲報之德如之何弗思  
庶幾夙夜我心不違

春日遲遲葛生蒙楚母曰嗟子季行後適彼樂土誰其  
知之爰得我所有紀有堂築室百堵自堂徂基于河之  
澍相其流泉泉源在左於我居處西南其戶

春日遲遲乃寢乃興焉得諼草殖殖其庭子兮子兮靡

依匪母子有酒食嘗其旨否左右秩秩其俎孔碩南有  
嘉魚或燔或炙令妻壽母陳饋八簋洽比其鄰式燕且  
喜宜弟君子有孝有德敬慎威儀其儀不忒天錫純嘏  
如岡如阜如松柏之茂俾爾熾而昌保艾爾後俾爾耆  
而艾以介耆壽

春日四章二章章十四句一章十二句一章廿  
八句

馬鑒公振集

磨字公振一字國瑞崑山之東滄人幼酷志讀書好文尚雅以華其家聲元季避兵松江之南鍾巷里築室鑿池有田園花木之趣日誦經史遇佳客往來則觴咏不輟與世泊如也楊鐵厓深器重之稱為忘年友有醉漁草堂二集

婁東園雅集分韻得兩字

步出東郭門曦車簫雲上園容媚嬋娟海色射泱莽老仙瀛洲來鐵笛舊逸響好鳥啼木末驚起飛兩兩珍圖

雜細帙於焉得真賞清驩信浹洽閒情足蕭爽歸歟掩  
闌坐俗駕毋勞枉

虎丘燕集送

闕

之秣陵分賦涵空閣

步游靈巖山陟彼涵空閣層巒鬱鬱深迴結構俯寥廓梯  
石擁闌干飛軒並崖壑湖光日滉漾雲氣紛栖薄矯首  
縱遐觀湛宇翔羣鶴秦淮渺河許引領心有托飲餞相  
晤言朋知足娛樂殷勤送子行清風振臺柏

春夜樂

越羅複幔茱萸紅蹙金繡帶蟠雙龍銅盤膩燭傳香蠟  
簾箔星光釘文甲金刀割紅關金烹豆蔻壓春頰玉罌  
神仙舞盤踏月行鴈沙印雪留雲纓朱絲泠泠金粟柱  
風流上客瓊林主碧海煙中采香婦溼花仙骨沾春雨

獨酌謠

獨酌謠獨酌當中宵中宵萬籟寂獨酌興歌謠玉露下  
金井銀河流素濤一酌再酌神思超安得十洲仙人共  
傾倒駕風鞭霆歷覽八極同遊遨魯戈莫麾斥義車莫

招搖便當甕頭醉笑解黃金貂君不見車輪馬足長安  
道雞鳴五更天未曉又不見北邙風雨跡如埽石駝斷  
碣眠秋草天飈泠泠吹我襟獨酌獨酌慰我心流光去  
人那復得洗盞自歌還自吟

花游曲和鐵厓先生

綺樓十二浮空濛寶衣翠絡熏麝風宮裝窈窕銀屏裏  
鸚鵡呼名隔江水荔枝木瓜花覆門珠佩丁東搖曲裙  
館娃宮裏潘妃步贏得一丘紅粉墓探花仙子何處來

乳酒百罰行深杯  
夜闌酒倒揮玉腕  
遮莫城頭催漏板  
人生一身東復西  
花遊日日須留題  
尚記題詩連宮使  
字落驪珠三十四  
金花重賜五雲箋  
製作清平樂府篇

和楊廉夫新居韻

楊子樓居飲馬河  
書舟日日艤晴波  
未論粟里功名薄  
總為夔州詩句多  
遠樹入簾秋若畫  
亂雲渡水白於鵞  
何當共把凌風袂  
醉和仙人鐵笛歌

題趙承旨竹居圖



魏國圖書天下無當時聲價滿皇都萬篇文繡垂金甌  
一段冰清置玉壺碧海春深龍出蟄丹山月白鳳生雛  
看雲忽起苔溪夢便欲乘舟訪五湖

婁江餽餉

海波不動絕奔鯨萬斛龍驤一葉輕三月開洋春正好  
南風十日到神京

吳浦歸帆

一帆風便出吳城只怕沙湖風浪生野鴨斷邊初繫纜

西山月出正潮平

半涇

魚船商船喜通津  
撾鼓推牛祀海神  
風色趁潮波浪急  
扁舟愁殺渡頭人

古塘秋月

錢塘東去海潮生  
吳浦東來舟自橫  
十里無波秋浩蕩  
流光直到鑑閭城

武陵市舍

溪頭不種桃花樹商賈年年橋上多昨日扁舟風雨過  
無人肯著釣魚蓑

呂誠來鶴草堂橐既白軒橐竹洲歸田橐敬夫橐  
誠字敬夫後名肅崑山之東滄人今隸太倉東  
滄之俗尚靡獨能去豪習事文雅名士咸與之  
交家有園林嘗蓄一鶴復有鶴自來為伍因築  
來鶴亭復有梅雪齋日與郭義仲陸良貴唱和  
其間邑令屢聘為訓導不起卒老於鄉所著有

來鶴亭既白軒番禺竹洲歸田諸稟敬夫少力  
學師昆陽鄭東李明既長益氣夷色莊學端識  
敏且工為詩李明謂其詞多奇麗清婉出己意  
見不屑剽取古今人言其聲一出於和且美玉  
山主人稱其詩意清新不為腐語如木花徧地  
牽雲白竹色當簾落酒青靈浪潤咽消宿酒飛  
花如粟點秋衣皆佳句也又善作黃庭小楷繕  
寫其詩成集輒邀楊鐵厓評之鐵厓題其詩曰

蘇支邑凡六獨崑山多才子魁出者往往稱呂  
袁袁曰子英呂曰敬夫也

池亭雅集得回字

以下來鶴草堂稟

池閣清冷曉四開風泉滿院殷輕雷謝家草色侵衣上  
司馬琴聲到幕迴瓊樹亞枝飛鶴子紅梁雕甲膩螽杯  
諸郎醉墨淋漓甚未絕風流宋玉才

暮春鶴亭謾興

綠樹軒牕鷺子過清陰密覆小坡陀笙調鳳味新黃澀

礎潤龜趺宿雨多  
落絮遊絲空散漫  
野情幽思欲如何  
日長倦倚烏皮几  
閒染霜毫試行波

登蘇臺懷古

三月長洲花亂開  
酒酣移客一登臺  
繞城山色臨吳會  
滿地溪聲走越來  
北闕天高星使下  
西陵日落釣船迴

獨憐秦伯荒祠在  
烟雨金鋪長綠苔

吳有越  
來溪

賦帶露櫻桃

萬綠叢中綴木難  
折來靈液尚漣漣  
玉纖香剝雞頭軟

仙掌寒分鶴頂丹  
天酒淋漓拱子醉  
月盤璀璨漢臣看  
不妨更漬薔薇水  
潤我談玄舌本乾

秋曉

雞號天未明  
析靜四鄰寂  
疎星如聯珠  
殘月懸毀壁  
風清鶴在林  
露重水成滴  
危坐絕百非  
嗒然喪形質  
大明啓東方  
雲霞半空赤

大庾嶺留題二首

晨興散策雲封寺  
巖岫天開紫翠圖  
一水南來分百粵

大江東下八三吳

霜旭開晴曉出關衝寒驢子  
蛭攢攢西風百里南雄道  
綠樹丹楓滿意看

南行舟中三首

春開冬開巖下花朝虛暮虛溪裏家  
白帽漁郎衫色瘦  
青袞樵女髻鬟丫

荔枝花發暗蠻村孔雀驚寒減翠紋  
也有北人開眼處  
碧山無數插紅雲



小舫行無車馬喧短橈輕槳破江烟無由遠逐軒皇駕  
素瑟重聽五十絃

湏陽峽山飛來寺

峽山山上飛來寺紺閣層層樹裏開僧壁不隨殢女化  
梵鐘曾逐蜃樓迴萬松夾道時聞雨衆壑奔流夜殷雷  
猶有昔賢珠玉在斷碑剝落委莓苔

殢女乃孫恪妻後  
至寺還壁化殢而

番禺漫興

炎方弔古易興衰知是昆明幾劫灰  
黃木灣圍南海廟  
白雲山擁粵王臺百年此地衣冠盡  
五月南風船舶來  
遊覽尚餘高興在恩恩莫遣二毛催

莫言南海是天涯遠客何妨歲月賒  
豈謂居夸忘故土  
直須浮海上靈槎藥洲日卧仙羊去  
蕃塔風高鐵鳳斜  
白首飄零誰慰藉幾迴松菊夢還家

南海口號六首

象郡大藩當百粵羊城方面鎮南州  
環山雉堞雲霞曉

落日旌旗海嶠秋

荒服未嘗霑政化  
島夷今始識衣冠  
船來爭市龍魚鮓  
客至先須荔子盤

誰家女兒高髻妝  
行春踏花屐齒香  
留客不將茶當酒  
銅盤萸葉進檳榔

看春客裏逢元夕  
大市小市燒燈紅  
女郎手鼓如杯大  
半夜答歌明月中

炎方物色異東吳  
桂蠹椰漿代酪奴  
十月煖寒開小閣

張燈團坐打邊爐

儻萬夸人不著衣  
纈花藜布滿身圍  
輕舟似葉爭飄海  
載得檳榔換米歸

越樓觀燈

午夜冰輪爛不收  
又看春色滿南州  
沈香火底鼇山柱  
翠幙星前羯鼓樓  
小隊天魔花作陣  
初筵雲醴玉為舟  
要知此景非人世  
何必羅公作幻遊

粵王臺懷古

神劍當時斷白蛇，華夸悲入卯金家。  
徒憐南海居蛙坎，未識中原制犬牙。  
獻璧稱藩真得計，橐金滿載已堪嗟。  
荆榛滿目荒臺下，獨倚東風聽暮笳。

遊白雲諸山三首

半空蒼翠薄層崖，萬木森森礙日車。  
八十老禪延客坐，九龍井上試新茶。

後巖巖上看飛泉，蒲澗曾聞降五仙。  
黃竹斷碑前代燼，禹糧堯韭昔人傳。

瑤草春深白鹿眠  
丹霞樓閣翠生烟  
偶來石上尋棋局  
猶恐歸時不記年

訶林光孝寺方丈

斜日荒涼噪乳鴉  
菩提新葉小於茶  
石廓久雨無人到  
落盡閒庭訶子華

小孤山夜泊

彭浪磯頭江水深  
小孤祠前風滿林  
秋山青青秋月白  
霜裏吹簫龍夜吟

洪武辛亥南歸重度梅關二首

去年竄逐下南溟萬里歸來鬢已星望入西州天一髮  
香爐長繞九江青

歸路籃輿鶴背輕保昌東下過長亭今朝又向梅關度  
此是江南第一程

舟中望廬山

廬山昔在圖中見落星渚前今始逢雲嶺半藏紅葉寺  
霜風遙遞翠微鐘龍君或居彭蠡澤仙人愛住香爐峯

雙鳬之舄儻可借飛入前頭聽玉涼

太湖晚泊

震澤三萬六千頃日月出沒波濤中  
冰壺寒浸林屋洞青壁下嵌馮夷宮  
霜林人家橘子熟晚飯柁樓菰米紅  
羽仙黃鶴時相遇知是銀河一竅通

月下獨酌聞桂香

今宵風月儘清酣碧海寒光萬丈涵  
天上散花香第一尊前舞袖影成三  
方諸玉露清於醪崖密金橙小勝柑



老興此時原不淺  
高歌猶憶望江南

送人之潮兼簡鄉友

瘴雨蠻風晚更寒  
揭揚山色滿征鞍  
臨行漫寫相思句  
好與東吳故舊看

七月十五夜對月分得樓字

東池月滿重開席  
不減當年庾亮樓  
每謂人生須縱飲  
固知物色總難留  
螢光過慢還星散  
雲氣行天似水流  
高興無窮

一作最憶故人

秋滿眼  
山陰何處有行舟

咏菩提葉燈

寶林姜葉墮天風一落人間便不同  
雲鏡熒煌開月匣  
并力裁翦費春工  
星攢蜩翼冰綃薄  
華擁蝦鬚玉柵紅  
從此可傳無盡跋  
五湖今有水晶宮

題墨梅圖

凌霄峰頂雪初乾  
煖逼繁枝玉作團  
三尺溪藤散香影  
絳紗籠燭夜深看

秋江晚霽圖

長天斂盡落霞紅  
草屋炊烟野渡東  
一帶寒沙秋水白  
荻花吹老鯉魚風

南歸遣懷

海南每憶越王樓  
可奈鄉關萬里愁  
對客花前椰子酒  
看山馬上木綿裘  
羈縻此日生還喜  
準擬歸耕老去休  
愧我無家憐晚歲  
卜鄰終在漢西頭

安慶

市樓突兀凌波起  
樓上女兒未梳洗  
短篷初泊酒家門

新釀玉壺香十里買魚沽酒挂蒲帆九月淮村風日美  
回頭遙望大龍山翠屏滅沒寒烟紫

歸來

徒步歸來海上城荆榛滿路不堪行問人倏忽更貧富  
訪友淒涼半死生烏寶無神悲積帑青松有淚對空塋  
逆流一片門前水猶對青山落日明

南歸海上訪友

北風吹鴈渡江烟訪舊東吳晚泊船野水似龍爭入海

大星如月獨當天  
羌村夢寐青燈下  
蜀道間關白髮年  
兵革漂流無倚著  
渺余何處賦歸田

暮春感懷

以下既白軒稿

春雨屋上鳴流泉  
竹間瀉清晨望原隰  
新綠或可藉維時  
春夏交節序驚代謝  
悠悠念陳跡默默觀  
蠹化人生夫如何  
胡不稅塵駕

露坐

虛庭坐涼夕  
宵永覺衣薄  
犬吠古塔鈴  
烏啼野城柝  
感

舊心孔哀懷人興殊惡仰視斗杓傾西林月初落

送錢道士遊武當

武當諸峰何壯哉大朶小朶青蓮開玄聖高居天地戶  
赤日下照金銀臺神龜六眼電光走山鬼一足雲頭來  
道人再拜望北極應帶滿身星斗迴

寄廉夫

揚子十年官不調如此闕州文力何洞庭鐵遂龍吹得

天上瓊書鶴寄多車子看花將一兩雪兒行酒豔雙歌

時時對客教絃索繡領單衫月色羅

祀崑山東齋龍洲劉先生墓

黃鶴磯頭風雨秋中原一望使人愁羣臣誰決和戎議

九廟猶銜誤國羞慷慨魯連寧蹈

一作入

海淒涼王粲重

登樓荒岡四尺先生墓再拜酌之雙玉舟

和顧玉山詩韻

春來世事益艱危怪底閒情強賦詩楊柳愁空陶令宅  
荷花吟遍白家池眼前陵谷驚遷變客裏江山喜護持

兩度寄書煩慰藉相從深愧負幽期

題美人圖

繡林風暖鬱金裘曉起蛾眉八字分翠管成龍吹怨曲  
雲梭銜鳳織回紋茶縻酒熟春江雪豆蔻花開曉樹雲  
照檻扶桑紅日透自援綵筆賦東君

題極目亭

海虞亭子層闌上高與清秋爽氣俱歷歷吳山明落照  
茫茫淮甸入平蕪興亡千古看棋局晴雨四時開畫圖



日日憑闌瞻北固仙人借得一雙鳬

既白水軒

水軒如笠大聊作一枝樓晚飯長腰米朝盤短杖藜江  
湖雙短鬢日月兩醺雞徙倚郊原望王孫草又迷

首夏田家雨中

細雨朝來濕白沙風前整整復斜斜林蕉間展琉璃葉  
野蔓競發金銀花田父扶犁驅一犢稚女踏車垂兩丫  
年年梅熟愁蒸暑却愛小池鳴亂蛙

洪武庚申夏四月登玉山頂時雅上人適遷華藏  
於塔院歷覽終日而返是夕宿友人家燈前聞雨

援筆有賦

曉出城西門蕩漾官河艇朝光散晴旭露氣擁高迴潮  
上洲渚沒棹發六飛騁前岑獻奇狀心目快引領青山  
如故人登陟在俄頃嗟哉二三子憐我足力逞捨舟入  
蒼翠一逕林木靜陰蘚護危棧古藤落簪井映帶列檣  
杉青黃熟梅杏古師安禪處神物伏精猛山靈詭異工

幻蹟一埽屏孤塔灰劫餘傲兀立峰頂後巖古華藏稍  
復毘廬境泛觀盛衰際何物得修永道人出迎客一笑  
具羞茗清談竟終日毛骨灑然冷羣鳥亦知還微陽下  
西嶺遙歸弗成寐張燈酌楠一作南癭急雨何方來清聲  
雜蛙黽鄙言詎成章聊假管城穎

田居書懷

僻居婁西村歲月嗟屢過桑麻八口家僅示免饑餓公  
田倩牛耕癡兒固慵惰雖之甘脆供所賴出春磨前榮

蔭高榆後坡竹千箇薰風颯然來自足償高卧念無謝  
傅才甘受婁公唾

觀刈晚歸

堪笑南塘野老家客來無酒只烹茶池荒蓮蛹青房子  
霜老雞人絳幘花海氣東連瑤浦暗江流西繞玉山斜  
扶藜緩步歸來晚閒看汙邪載滿車

月下懷友

秋庭夜沈寥雲影絕纖毫月轉青霄迴星臨紫極高蟻

酷金錯落鳳吹鬢輪袍不舉山陰棹空孤一世豪

寒食郊行

草軟沙平步履輕百錢日日繫烏藤市橋風旆梨花酒  
遊女春衫柿蒂綾烏帽飄蕭明素髮石磨敲側卧荒陵  
百年俯仰須臾事遊覽怱怱愧未能

三江祠戲贈二首

三江口頭日欲晡三江女兒自當壚今朝南浦送郎去  
望斷東風檣上烏

牆頭五兩逐風輕聽得吳歌慘別情一片劉家河上月  
照郎直到定遼城

漫興三首

寂寂高門大道邊東風愁鎖綠楊烟大兒已入滇池戍  
嫠婦空耕隴上田

赭服從戎萬里行風餐水宿事宵征金沙江繞烏蠻砦  
越雋山連孟獲城

雨餘江色碧浮空一髮青山落照中去棹休歌桃葉渡

行人愁殺柳花風

十六夜對月

月夕浮雲變蒼狗無術因之徹其鄙海風今夜東南來  
盡捲飛埃絕塵垢碧天萬里開冰壺清光落我持杯手  
宿雨聯翩翻露巢寒兔迷離擣霜白嘉賓况爾平生懽  
如此良宵寧可負鄰家翹生好風味三百青錢呼一斗  
桂香正熟菊未荻蓴羹爛煮橙可剖清樽倒射白獸光  
綠波蕩搖金虬走老農斷葦不止酒喜客和月吞入口

興酣且致豐豐談歌成自答嗚嗚缶百年此樂能幾何  
瓢空更起謀諸婦身閒無事古所貴有客無酒時則不  
但願月光長入杯歲歲年年為君壽明朝更上文筆峯  
探支西風作重九

雙清詩二首

并序

梅花水仙一草木也其生恒在水涯幽谷之間  
發於萬木搖落之後不以榮悴生死異其芳不  
以春秋寒暑易其操雖窮冬盛雪猶介然與松



竹爭奇並茂有類乎高人逸士懷抱道德遜世  
絕俗而高風雅志自有不可及者余雖不敏心  
甚慕惜之故賦此以識云

怪得荒寒野水濱疎花冷蕊看橫陳歌翻玉樹多嫌俗  
夢喚梨雲却久真半點不煩春刻畫一分猶仗雪精神  
臘團新萼雖同出未免韓公議小醇

湘魂懶上木蘭舟淪落江南草莽丘澹色幽香羞自獻  
江空歲晚若為儔素羅微步盈盈月翠袖寒分寸寸秋

隔竹似聞靈瑟語吳雲楚雨不勝愁

覓菊花二絕句

已過秋風九日秋蒼筤池上若為遊似聞嘉菊黃於鵠  
乞我雙栽照白頭

洲上黃花滿意開倩人更為覓奇栽小桃源裏秋如水  
分取清香一半來

竹枝歌六首寄胡定安

上思下思十萬山左海右江如月彎江邊神女長留佩

天上仙人早賜環

銅柱山前銅鼓聲  
野花蠻果不知名  
却喜土人能愛客  
蔓蒂檳榔相送行

雲開沙淨水洄洄  
越鳥啼邊未槿開  
洞裏蠻丁不畏瘴  
朝朝衝霧趁虛來

客擢愁行湘水波  
憑郎莫唱竹枝歌  
好山好水春更好  
不見閒人載酒過

春雲好墨瘴烟中  
鸚鵡羣飛荔子紅  
男兒守家婦當戍

越俗古來成土風

春草湖頭春日暉  
芡蘿山上白雲飛  
行人莫聽鷓鴣怨  
陌上花開緩緩歸

採蓮曲

采蓮落日下雙舟  
白穀風輕易覺秋  
淺淺溪流齊鶴膝  
青青荷葉過人頭

題翠濤軒為則銘作

七尺烏藤手自操  
鯉魚風起月輪高  
帶將一箇城南樹

五賈岡頭看翠濤

謝惠菜

江鄉正月尾菜臺味勝肉莖同牛乳  
腴葉映翠釵綠每  
辱鄰家贈頗慰老夫腹囊中留百錢  
一日買一束

過麋洲書舍寄葛青城

以下竹洲歸田集

重來問訊東橋竹竹裏鉏雲結草堂  
隔草淮山當鴈汊  
半陂春水護麋場交遊契濶頻搔首  
今古興亡一斷腸  
田野不妨聊卒歲  
宦途何處是康莊

三月廿日過桐菴陸氏故居感而有賦

昔年曾醉陸家池  
白首重來有所思  
野哭鄰啼如昨日  
陸遷谷變異當時  
喧林衆鳥偷櫻子  
卧石羣羊沒兔葵  
莫說華亭千古事  
故宮禾黍正離離

題吹笙仙女二圖

森森羽節導雲輶  
鸞背微聞縹緲笙  
小隊霓裳多似雨  
衆中誰是董雙成

鰲背三峰水殿虛  
天香吹滿六銖衣  
青禽忽報麻姑信

獨自吹笙月下歸

五月廿日雨懷有寄

竹洲草樹暗漁莊五月雨多沙水黃  
蒼蒿林深書屋小  
芭蕉葉大酒樽涼  
乍瞻霽色收屏翳  
猶訝車聲走阿香  
冉冉途征塵沒馬懷人幽興詎能忘

寓言二首

苦瓠若懸癭宜瓢亦宜笙  
笙將用合雅瓢以供酌烹吾  
為苦瓢謀任力不任聲  
薦勞鋤鼎間自足資養生  
物賤

終反貴吹萬豈其情

少學老無成所守但糟粕譬如福與市涉海求靈藥豈  
不望三山風至輒引却歲闌坐窮陋青燈映疎箔雖微  
白足禪自置丹霞縛賤貧吾所安飲水差足樂鄰家日  
推牛不似西鄰禰

秋日雨後二首

浦口寒潮頻有信空中鳥跡了無痕野航落日東西渡  
黃葉秋風遠近村



曲碕茅屋兩三家  
返照垂虹隔斷霞  
風外葉聲來似雨  
莫嗔楊柳不藏鴉

秋夜

砌草蟲吟四壁靜  
簷竹搖燈動秋影  
老來無夢到陽臺  
開門月在青松頂

題杜少陵行春圖

牢落出同谷  
淒涼賦七歌  
日斜驢背上  
白髮似詩多

寄江南紹隆伯瑩

一冬風雪出村稀忽見梅花映酒旗行過江橋屢回首  
無人寄與紹隆師

正月廿三日借竹洲訪顧藏六於司馬廟

一番行春始出村韶華無賴已分平野鳥亂啼司馬廟  
石麟猶卧汲家墳燒痕新綠渾禁雨柳色半黃都染雲  
蕩涇橋頭有酒賣醉把梨花日又曛

客至

幽窻談笑話平生舊硯磨穿筆代耕白髮滿頭難諱老

青山排闥故多情  
桃花灼灼渾無語  
春雨瀟瀟尚未晴  
明日蘭舟休便發  
南鄰笋蕨已堪烹

九日前雨中

已知無地可登臨  
况是孤村風雨深  
酒為解憂惟有醉  
菊憐短髮不勝簪  
白魚出網一雙玉  
黃橙擣齏三寸金  
南北睽離佳節過  
壯游空感昔年心

題秋浦歸舟圖二首

碕岸楓林隔野橋  
楚王宮殿在山腰  
扁舟好趁樵風去

莫待寒江落晚潮

秋浦行舟日欲晡  
秋來到處有尊鱸  
酒家鱸具如堪借  
暫卸西風十幅蒲

寄懷鄉友浩然戍橫州

分袂每憐秋未半  
開帆猶記月初圓  
客程千里又千里  
老鬢一年衰一年  
令弟喜霑新雨露  
故鄉不改舊山川  
懸知獻捷歸來日  
重理琵琶第四絃

寄鄉友福州別駕二首

烏石山前聽訟時  
石榴洞口看雲飛  
馬蹄好踏官街月  
人在青榕影裏歸

釀來南酒甜於蜜  
愛浴山泉熱勝湯  
退食自公微醉後  
小姬和葉進檳榔

和烹獐龍詩韻

雷公傳令風火急  
鞭起雨工頭戢戢  
泥蟠骨蛻未能飛  
野人爭奮長劍入  
獐須逆鱗不復畏  
斯須唯聞釜中泣  
金杯苦酒五色光  
玉版雲腴乳花濕  
長房見之發長歎

麴生一笑恣鯨吸靈物變化不可常駢玉森森作人立

四月廿四日雨中寄仲莊

四月江鄉暑尚微林寒老客未更衣復愁刈麥雨不止  
況是索租人正饑穀秧出水青青短莖竒登盤箇箇肥  
門外泥深無轍迹相從莫怪出村稀

次韻答偶武孟

猶憶當年應鵲頭詩名從此達南洲狂歌賴有千鍾酒  
豪士今無百尺樓紫蠅白魚江市晚綠蕪紅樹海門秋

西風開到籬根菊擬向桃源一繫舟

白紙扇歌

聞次安惠紙扇  
因賦此以贈之

我昔舟泊江西湄推冰看擣萬楮皮江神相過色慘愴  
波工自詫手不龜懷金問價雲滿篋霜紈失素無晶輝  
廿年歸來存百一製成團扇真絕奇紅爐百煉太古雪  
紫雲三尺盤屈鐵銀潢影射秋鑑光玉虹冷貫青天月  
昏目摩挲驚老醜動搖清風生腋肘高堂晝把蠅蚋空  
魑魅潛藏飛電走豈不聞戴老不識王右軍茂弘曾障

元規塵謝公高風固足尚班女簾笥空悲呻烏飛兔擲  
急於箭商飈奄忽號枯林嗚呼盛衰天地無古今炎涼  
不易君子心

讀宋太史詩文集漫書

金華山下古潛溪秀發英靈間世奇歲久不聞清廟瑟  
眼明今見玉堂詩百年人物推此老一代風流當繼誰  
頗恨淹留忘墜景遺編徒使後來悲

菊田 并序



余客竹洲三年頗有彭澤東籬之好古人亦謂  
菊獨以秋花傲兀於搖落之後非霜下之傑乎  
昔年曾賦對菊之歌老興未已復作菊田一首  
以紀歲月耳

搖落西風已愴然金蕤月朶為誰妍人間無地安花宅  
洲上於今有菊田晚歲擬尋甘谷老顏齡幸值傳延年  
落英殫盡秋香骨許我飛行作地仙

訪成真觀有感

并序

四十年前余訪秋雲楊外史於成真維時殿樓  
竹樹森竦邃密其琳宮桂館不是過也後十年  
外史化去世道變遷天運纔一周鞠為茂草荒  
墟然盛衰之變有不可得而語者如此今年春  
因訪舊復遊於此感而有賦是歲庚午正月十  
八日也

暮年重訪成真觀不見秋雲竹外樓枸杞經春皆化犬  
朱藤歷歲總如虬種桃道士馮虛去採若騷人汗漫遊

見說蓬萊又清淺擬將黃鶴問丹丘

題子昂畫馬圖卷

靈物降精生倨奇貢來自是千里駒天閑蕭蕭風滿旗  
立仗不受黃金羈吳興寫生世所稀春雷挾之上天飛

訪偶武孟蒼貧軒時武孟制滿求任

地有桃源徑

舊草溪東十里餘小桃源上見郊居落紅石

一作花

徑和

雲埽新綠爪畦趁雨鋤池上此君宜對酒門前長者屢  
迴車此中未讓商山老見說王褒有薦書

仲春雨後生寒有懷蒼簑室

東岡二月草芊綿  
淄淄寒雲雨後天  
楊柳三眠風作惡  
櫻桃半開春可憐  
詩域日荒拋硯石  
醉鄉時與打舷船  
清遊每憶蒼簑室  
何日重來看碧鮮

巨浸詩

并序

洪武庚午秋七月初吉  
海風自東北來拔木揚  
沙倒海排山堆阜高陵  
皆為漂沒猶記戊午秋  
七月四日亦嘗懼此蓋  
大魚入城之兆也今茲

震蕩勢復過之側聞三州一千七百家皆葬魚  
腹嗚呼上天號令豈有常乎可不慎歟可不畏

歟

庚午七月之初吉斷虹挾雨蔽西日石尤聲撼天為昏  
颶母驅車走沙石鯨跳鯤擲地軸翻陽爍陰凝鬼神泣  
銀濤駕空山嶽摧轉眼奔流浸扉壁三江瀾漫滅無口  
孤城潏潏天一碧衰年疲荼連兢畏變貌齋心戒夕惕  
憶昔前年大魚入三洲漂蕩海水立近者側聞復罹此

海灣流屍頭戢戢岸塌沙沉絕往來膝斷壤深苗不實  
嗚呼上天震怒豈無由誰其尸之復誰詰

覓菊

并序

余向寓竹洲洲上種菊百餘栽繞屋盈圃過者  
因為菊田今年歸草堂似聞秋風駕潮掃蕩無  
遺擬與吾友求數株聊應重陽故事如何

秋潮橫挾風雨顛洲上空聞有菊田香色於人既無有  
物情在我敢求全頗憐塵世光陰迅似覺人間雨露偏

白髮滿頭難諱老蒼顏對客強為妍  
豈惟酒向鄰家得自是杯從舊日傳  
陶宰不妨多種秫杜陵且莫數無錢  
青天鴈影西風外紅樹秋聲落照邊  
見說南莊饒物色少分清豔到樽前

訪友

并序

洪武庚午九月廿七日訪鈕聲遠於太倉城之  
正陽門造其室曰洞雲四簷竹樹盈山清氣可  
掬因賦此詩并求其畫山圖云

先生家住正陽門繞屋松聲日夜聞大藥總消頭上雪  
小山長帶洞中雲已知濟物宜終慶況是清時屬右文  
却歎一作笑吾詩與君畫海門風月擬平分

東溟生詩為顧某賦

東溟之生何所聞抱藝學古以事親翛然一室東海村  
市塵不到絕垢氛坐見三洲渺無垠一碧萬里玻璃盆  
雪濤銀屋相吐吞爛霞浴出扶桑暎是時幽人侍晏溫  
菽水之樂樂天真興來揮掃水墨渾下筆慘淡愁鬼神



居然耕鑿生意存經營態度迴陽春百年縑素琴斷紋  
擣標裝潢稱絕倫由其天機出清新能事逸發皆可人  
素昧平生笑語親一日索書來叩門嗟余耳聵目力昏  
那能復作寒蠶呻霜風搜林葉繽紛寒菊豔豔東籬根  
姑置是事且勿論與子倒盡花前樽

荆溪棹歌四首

荆溪溪上晚山稠沙棠港口木蘭舟裏頭女子唱歌去  
水色山光總是愁

大男鑿山衣盡紅中男操舟慣張篷獨山門外北風惡  
白浪如天怖殺濃

溪上雪消春水高鷺黃新柳暗長橋橋頭人家好春酒  
無情長與駐蘭橈

雙舟來往奈愁何日日溪中聽擢歌溪水西流流不斷  
海門東去作風波

竹枝詞三首

千夫萬夫暄作堆什什五五魚貫腮長興步頭候糧去

紅闌街裏買薪來

臘支山頭雨雪飛  
臘支山前人苦饑  
山下斧斤夜達旦  
山上閒雲長自歸

十八里岡雲有無  
炎風埽地雪模糊  
山川通塞奚能問  
閒看清波入太湖

寄懷菑川基古石二首北山翁也

身閒無事且婆娑  
轉眼流年一擲梭  
牢落詩懷三月過  
顛狂風信五更多  
潮來海市魚論斗  
柳暗江林鳥弄歌

頗訝寥寥無信使題詩為問近如何

寄謝謚西堂惠紙二首

雲繭羅紋幸見投烏皮几上雪凝眸懷人端為雙魚信  
作賦空慚五鳳樓

翠峰山下連吳會雪浪東來入海門胸次不留元字脚  
金香爐下鐵崑崙

感興二首

靜室無塵少客過新篁陰曳小坡陀朝來始悟春歸盡

風裏楊花似雨多

落花寂寂掩柴荆  
滿地綠陰新  
筍生自是老來遊興減  
江山何處不堪行

題水墨龍圖

畫史憑陵造化機  
研池傾倒墨龍飛  
生綃半幅春雲濕  
疑是前山作雨歸

五月廿八日重過翠濤軒  
清坐終日薄暮而歸賦  
此蓋書所見也  
翠濤為竹而得名  
余不能無辭矣

幽人愛竹不喫筍養得修篁箇箇長五月六月雨不落  
千枝萬枝風自涼蒼雪逼人時展簟翠濤驚夢午移牀  
涓涓清潤烏皮儿楚楚高攬薜荔牆密影掃階數瑣碎  
餘音拂水度笙簧孫枝迸地渾疑占老節凌雲色更蒼  
三徑旋開真得計七賢避世故佯狂因懷梅友稱三絕  
却笑荷花似六郎白鶴歸時雲動蕩青鸞嘯處夜微茫  
對之可使食無肉衰矣空慚鬢有霜隱几無心開卷帙  
捲簾隨意炷爐香日中見斗瞻霄漢月下吹簫引鳳凰

物外襟懷差可共  
閑中滋味淡相忘  
不尋酒伴雞豚社  
誤落詩名錦繡坊  
時復開樽排匝匝  
每憐學子走踟躕  
興來坐久無聊賴  
老去頻過也不妨  
他日成材惟汙簡  
於今觸目盡琳琅  
振衣散策歸來後  
江路迢迢又夕陽  
則明遊餘杭三橋步回過余草堂賦此謝之

秋日三橋步行舟野色新  
亂山圍草市荒墟接江津  
杉竹通蠻獠麋飯獵人欲  
將金粟酒為子拂征塵

題枯樹圖

鐵幹槎牙翠葉殘，雲根剝落古苔斑。  
大材寧盡天年老，不遇工師不出山。

九月晦訪聲遠留題

海門潮上水如烟，賀老重維載酒船。  
喜見雲山開雪壁，幸因郎困鼓冰絃。  
應門童子清於鶴，搗藥靈禽半是仙。  
歲晚卜鄰應有約，幾時行李到梅邊。

寄則明二首

時客於  
竹洲作

苜蓿花開徧地秋，秋聲渾在樹梢頭。  
西風昨夜吹歸夢。



喚起客懷無限愁

幾樹芙蓉近水低  
碧沙涼露泣莎雞  
月邊已有南來鴈  
飛過荻江官渡西

晚歸書事六言二首

訪舊五溪薄暮沙長歸路迢遙  
虛市人家燒燭流水孤村斷橋  
一箇殘僧待渡數聲短笛歸樵  
閃閃昏鴉啼後江風又落寒潮

渙榜溪翁罷酌郵鈴稚子傳書  
暝烟寒雪欲落臘柳半

黃耒舒雲葉落隨去鴈浪花潑刺跳魚一段詩情畫意  
蕭然風景愁余

醉歸

醉歸不覺已斜曛稚子驩迎先候門露林睡覺冷如水  
樹影滿牕疑是雲

題黃鶴山樵畫匡山讀書圖

黃鶴山人美如玉長年愛山看不足醉拈秃筆埽秋光  
割截匡山雲一幅詩豪每憶青蓮仙結巢讀書長醉眠

我欲因之攬秀色雙鳬飛墮香爐前

寒食漫興書所見二首

楊柳東風日夜顛杏桃無語不成妍  
水流竟沒鷗邊石雨重渾迷卵色天  
節序怱怱無可那物情洶洶最堪憐  
荒村閒寂無雞犬何處人來掃墓田

三月三日雨初晴清旦梳頭坐草亭  
一坡草色為誰綠千樹柳條無賴青  
憂患未平心耿耿衰遲那遣鬢星星  
林鴝底事頻呼婦強聒春愁苦厭聽

九日雨中雜興

霜降海門天氣肅無邊  
落木總繽紛鷗眠夜渡芙蓉雨  
鴈落秋田擺掣雲未有詩篇酬令節  
祇將茗盃對爐薰  
月中桂子飄人世時有天香隔幔聞

聽雨

傾倒天瓢走雨工  
海門龍過起腥風  
蕭蕭午夜鳴山竹  
如在春江聽打篷

期友不至

長日閒吟步紫苔  
流光轉眼熟黃梅  
雄風豪雨將春去  
濁垢深泥少客來  
老柘葉稀愁繭瘦  
草田水漫厭鷗催  
題詩問訊王文學  
懷抱何時一笑開

風雨連日閉戶默坐  
懷思可知  
忽翠濤軒以筍簾  
之惠走筆答之

春事都隨逝水東  
不堪日夜雨兼風  
龍歸海浦沈雲黑  
鳥啄櫻桃落子紅  
老境詎言詩有債  
醉鄉誰謂酒無功  
鮭蔬向賴西鄰筍  
薑韭時將五尺僮

集句題水仙圖

秋水為神玉為骨山礬為弟梅是兄恍然坐我水仙府  
吾與汝曹俱眼明

雜詩五首

以下見玉山雅集

三月南江渡行春屬晚晴留連花下榻醺酒待潮生  
開船收雨色新水達春江瀾瀾元無侶睢鳩自一雙  
青天歸鴈喜密樹坐鶯深落日春愁裏懷人浩蕩心  
城門踏青草城下楊華度荒隴無耕人三月輸官賦

近江喬木裏疆半棣華栽葉覆青青蔓相沿別樹開

倣李商隱一首

華落銅盤蠟炬融逶迤春色照夫容當筵行酒金釵側  
隔座吹笙繡幕重已有鸞刀飛鱠縷未須翠釜出駝峯  
夜深環佩雲中過宛在瑤臺月下逢

登澱山寺

一上湖南澱山寺寺門高開秋樹顛下界雲煙惟一氣  
八方樓閣駐諸天無風靈籟時生壑深夜神龍或起淵

我獨題詩此臨眺寥寥宇宙幾千年

懷友

炎夏夜景靜齋閣臨前池當檐素月流舉扇涼颼吹參差  
丹棘花婀娜紅蓮枝玉人美無度耿耿勞我思

江水辭送友人之龍江二首

江水一百里南風一日程飛華多意緒相逐柁樓行  
江水五百里上有蘭與芷采之遺所思含情似江水

采蓮曲和鐵厓先生二首



刺船水中央攏船乘晚涼  
近番灘上過葉裏好鶯鶯  
盈盈藕上花采采墮清淚  
願將心中絲繫君雙玉佩

蹋踘篇和鐵厓先生二首

江南稚女顏色新  
百花樓前蹋繡輪  
紅蕖小鞦不動塵  
不動塵放嬌態微風來舞裙帶

芙蓉小踘蹋曉風  
金壁步搖聲丁冬  
繡衫窄窄交斜紅  
交斜紅露玉腕揮紫綿浥香汗

草堂紀事二首

六月四日登草閣雲薄林深暑氣消無賴野鶯飛箇箇  
不知風雨一朝朝

池上戎葵高一丈白白朱朱復可哀近報彩舟來浦口  
頻開金艤向花開

過沙湖賦竹枝詩

白沙湖頭月色新白沙湖裏水如銀可是吳宮雙玉管  
聽得一聲愁殺人

題萱蝶圖

堂前萱草散滿地  
朶朶幽華也可憐  
絕愛簪簪相映帶  
生憎蛺蝶舞留連

和靖看梅圖

西泠橋下林家墓  
猶有舊時無數花  
孤雲何處雙飛鶴  
落日鷓鴣滿白沙

舟中三首

潮發江門百餘里  
曉過夫容湖上頭  
娟娟秋風吹櫂柳  
層層雲氣蓋船樓

無聲星光駕秋色即看露氣薄人衣逶迤流吹天頭落  
潑刺驚烏樹裏飛

天河垂地月光白荻岸秋連野水青浪靜楚漚來片片  
櫓搖楓葉下冥冥

渡吳淞江

九月渡江江水落荻花岸岸與秋連沙橋散側平當樹  
江鶴翻迴巧觸船

送姚子華浙東帥府掾

掾郎辟舉南州掾炳炳才名蚤歲收幕府簡書閒白晝  
戟門旌旆卷高秋花開擬上瀛洲看酒熟頻為鑑曲遊  
北來或有雙魚使煩寄新詩寫我憂

和鐵厓西湖竹枝詞

以下補遺

江頭竹枝青復黃纖纖纖纖作養蠶筐下可採桑南陌上  
不願黃金逢貴郎

送瞿惠夫青龍鎮學官二首

山雨蕭蕭夜轉多思君別後定如何惟犀怪底時時動

池上東風生綠波

雲影垂江護晏陰題詩東閣晚寒侵便須騎馬迎君去  
街上青泥三尺深

題宋楊補之墨梅

繁華漸覺枝頭少冷蝶寒蜂盡不來寄語春風莫相妬  
明年還我最先開

俞遠豆亭集

遠字之近江陰鳳歌鄉人隱居教授自號空谷

因稱空谷先生身癯神骨秀竦目光熒熒好著  
小冠戴方山椶笠衣白綺裘儼然神仙中人行  
出一市盡驚至正壬辰鄉寇竊發所過殘毀乃  
築土為室嘯歌其中長吟短咏語必驚人如龍  
門桐歌小石灣行澄江八景等篇傳誦人口所  
著豆亭集學詩管見嘗自序其詩曰蟲之翦翦  
鳥之嚶嚶機動籟鳴豈得已不已乎不得已乎  
耳卒年七十二同里王逢挽詩云襄陽一耆舊

東魯古先生蓋重之也

挽王萊亭庫使

王逢之父

客行天下半波流日滔滔卓然王幙長獨詣見所操西  
風吹黃鵠瞥眼雲中翔無彼升天翼欲飛詎能高讀律  
三十年弗離州縣勞歸休青山郭緣溪置屋牢種瓜以  
為業不復求其曹饌甘盤有魚飲旨尊有醪兒賢曲奉  
養未慕樂陶陶奈何百年期懽忻變號咷望見雙梧樹  
我每涕沾袍梧樹奚足悲迴躅於焉韜



遊小石灣

前年遊小石小石之下江悠悠今年遊小石江水只似  
前年流江流日夜流不息石根水齧成沙礫主家銀瓶  
三尺高長向江邊宴賓客江邊雲木藏華構主人不歸  
春鎖畫開門掃地借一作惜鋪筵舞影出闌驚雉雌一春

天氣今日佳城中千人萬人來步陣飄紅香散霧撲面  
不去飛塵埃移樽更就江流飲酒光五色沙如錦懸崖  
欲落未落處挽客更坐毛髮凜青天龍挂東海門颼風

忽來天畫昏白波如山潑山鼻坐恐此地為江吞金支  
翠旗光閃灑冉冉靈胥騎白馬我欲招之招不來大鯨  
噓紅射盞竿此景向來良不忤丈夫跌絕婦女愁手中  
橫竹孤鳳叫日脚迸落靡燕洲眼空高興不可遏割肉  
大啖湯沃雪風休月出浪復止小娃強歌聲不悅我言  
小石天下無衆客相顧皆胡盧說東洛談西湖我請謝  
客客莫誣西湖白鶴去不返東洛看花生已晚

澄江八景

蓉城曉煙

落月昏昏城樹白山煙一帶接閭居天高樓鼓晴光覺  
江近篝香潤不除刁斗營前看洗馬轆轤井上聚穿魚  
蓬萊有約蒲帆重欲問麻姑借羽車

巫門夜雨

巫子門前沙擁波泊舟黑夜雨滂沱龍呼匣劍辭人去  
鳥作飛車送鬼過翦燭頻昏抄細字看天未旦起狂歌  
玉關何處頭如雪明月長竿還挂蓑

海門賓日

天在海門東復東  
星移河落日曛  
瞳三聲雞唱齊州白  
五色鸞翔弱水紅  
舟楫盡登揚子岸  
衣冠應滿太空宮  
寸心老我傾葵藿  
扣缶狂歌鬢蓬蓬

孤山釣月

大江春石是孤山  
山下漁人戴鵝冠  
花發廣陵忘捩柁  
水吞雲夢好持竿  
珠光電轉龍堂晝  
玉屑空飛兔臼寒  
一曲靈歌歌遽止  
馮夷按節鼓狂瀾

石灣春霽

春月少晴晴即風石灣今日好春融已憐野水添杯綠  
更有雜花開樹紅錦帳移厨人簇簇銀鞍並妓馬瓏瓏  
擊壺錯按伊州弄句落鷗波浩蕩中

揚子秋濤

大江日日潮流地八月飛濤天半來高蹠一門危立海  
散馳千道殷崩雷鳥驚斷磧都相失鯨挂橫山不及回  
寄語北來能賦客江南奇觀遲登臺

沙嶼晚渡

吳山望斷楚山蒼  
江北江南一葦航  
野屋半開人慘澹  
征車相次馬玄黃  
羽竿風急回鳴鵝  
魚笥燈微隔樹桑  
指顧揚州莫惆悵  
燕姬樓上勸飛觴

淮甸晴眺

廣陵南盡是長川  
山隔川流不隔煙  
一騎看花來闕下  
千帆轉粟上天邊  
漚波鴈磧芻蕘合  
豚甯雞埭井絡懸  
我住孤城愁徧處  
定來釣弋過殘年

清隱軒

讀罷黃庭內景篇道人風度亦翩翩  
山中呼酒喚明月天上賜衣生紫煙  
啼過宮闈春幾度飛歸遼鶴世千年  
向來書榜詞林客可怪逢仙不學仙



元詩選三集卷十五